

二十 黃侃

黃侃，字季剛，別號病蟬，一署病禪，湖北蘄春人。受業餘杭章太炎，稱高足弟子。精音韻學，文法晉宋，亦晚清文壇之翹楚也。

季剛幼讀書，有神悟，父雲樵爲鄂中名翰林，博通經史百家，故其得力於庭訓者甚多也。早歲盛氣凌人，相傳避地日本時，與太炎適同寓一樓，偶便溺流入樓下，太炎大罵，亦報之以罵，因罵而相識，談國學，始知其淵博絕倫，非己所及，自是折節稱弟子。

太炎於古今人，俱少許可，獨稱季剛曰：「清通之學，安雅之詞，舉世罕與其匹，雖以師禮事余，轉相啓發者多矣。」入民國後，任北京大學教授，講說文，解剖精深，而學生殊少心得。相傳每當學期考試，試卷多不及格，諸生苦之。後偵知

季剛好冶遊，乃集資假妓院置酒以待，季剛欣然蒞止，自是考卷多及格矣。校長蔡元培聞其事責之，季剛曰：『彼等尙知尊師重道，故我不欲苛求。』蔡氏亦無可如何！

二

季剛任南京中央大學教授時，薪入較豐，生活亦甚暇豫，頗有好書癖，得金輒以半數購書籍，築廬於古台城下，藏書滿樓。五十誕辰，太炎壽以聯云：『韋編三絕今知命，黃絹初裁好著書。』不謂壽觴甫過，遽而物化，學術界亦大有損失也。

平生著述，積稿繁富，其於說文爾雅，考證尤精，凡數百萬言，散文詩詞，亦多性情語。有貽弟子某七律一首云：『盡除靴襪繼雅聲，眼中吾子快平生。要將松玉推靈運，頗有江山助屈平。濁酒君須來寂宅，偏師我欲滅長城。異材難得宜培護，祝爾終能紹往英。』婉約中而有豪宕氣，學人之詩也。

三

季剛對並世文人，最稱梁任公之流暢，章行嚴之典雅。惟行嚴佐合肥段氏時，有人假季剛名撰文詆之，季剛致書行嚴曰：『近見報載侃謗公之文，固有不便於公者爲之，然而，必不出之侃也。卽今民德澆漓，士習僂張，就此一端，可以推見。公居政地，有牖民匡俗之責，觀此橫流，憂勞其曷能已乎？侃固非有干於公，慮得罪於從者，然人不可妄毀，亦不可妄得毀人之名，故致書一白中誠。……』每觀前輩於友朋風義之際，從不稍忽，何以時至今日，人心轉詐，士風轉薄？豈真物質進步，而道德反墮落耶？此真不可解者也！